
Êşa Rojava

[Nîzamettîn]

Çûme Çiyayê Kurmênc, li nav gerîm
Efrîn mîna bûkan, bi xemla zêrîn
Min dît Efrîn bi ser xwe de dilorîn
Jê pirsîyam, hêstir ji çavan barîn
Bersiv sar bû li ser lêvên wê şêrîn

.

[Mizgîn]

Xort, keçen min ji bo welat cangorî
Ji Başûr ji Bakur venegerîn
Talan dibin dîkin hawar û qerîn
Dil û cîgera min ji sînga min çirîn
Heywax li min heywax, heywax li min
Heywax li min çawa welat tê dizîn!
Heywax li min heywax, heywax li min
Heywax li min çawa welat tê dizîn!

.

[Nîzamettîn]

Berê xwe min da çolê wê beriyê
Bûm mîvanê bajarê Kobaniyê
Min dît keçek digiriya li wê bejiyê
Bi dilsotî pirsîyam ji wê horiyê
Heywax li min heywax, heywax li min
Bi dilsotî pirsîyam ji wê horiyê
Heywax li min heywax, heywax li min

.

[Mizgîn]

Xwîna birayê min rijîya li vê gorîyê
Yarê min kuştin leşkerên suriyê
Herdu mirin bo eşqa azadiyê
Sonda min ji ku bigihe ronahiyê
Heywax li min heywax, heywax li min
Heywax li min ji vê zilm û zoriyê

.

[Nîzamettîn]

Ez çûme serdana Girê Şermola
Hat qîrîna zarok û mindalan
Pirsîyam ji sînemayê, ji dîwaran
Ji Amûdê hîn tê dengê hewaran
Heywax li min heywax, heywax li min
Ji Amûdê hîn tê dengê hewaran
Heywax li min ji nalîna şûnwaran

.

[Nîzamettîn]

Min berê xwe da bajarê evînê
Min dît Qamişloka'm di nava şînê
Şêxê şehîdan Mişel bi bîr tînê
Navê Mişel şehîd dinivîsînê
Navê Mişel Temo dinivîsînê

Heywax li min heywax ji vê lehiya xwînê

[Pêkve]

Dirbasiyê çara xwe lê nabînê

Dêrika Hemko rondikan dibarînê

Serê Kaniyê êşa xwe dilorînê

Kurd li Şamê dest danî ser birînê

Heywax limin heywax, heywax li min

Heywax li min ji wê lehiya xwînê.



<https://hunerakurdi.com/gotin/nizamettin-ariç/êş-2015/êşa-rojava/>

Nivîser: Amedo 12-06-2015

Guhertina dawî di: 26-08-2015